

Serie A N.º 2791692

Acta da Xunta de Goberno correspondente á ordinaria do 13 de xaneiro de 2017

No Pazo da Deputación Provincial de Ourense, o trece de xaneiro do ano dous mil dezasete, ás nove horas, reúnese a Xunta de Goberno da Deputación baixo a presidencia de don Rosendo Luis Fernández Fernández (vicepresidente 1º), en substitución do titular don José Manuel Baltar Blanco, presidente da mencionada Deputación -que como tal é da Xunta-, cos deputados/as, dona Montserrat Lama Nóvoa, don Plácido Álvarez Dobaño, don Manuel Doval Soto, dona Ana M.ª Villarino Pardo, don Pablo Pérez Pérez e don Juan Anta Rodríguez, os que constitúen a maioría absoluta da devandita xunta, co fin de celebrar sesión ordinaria en primeira convocatoria e tratar nela os asuntos que figuraban na orde do día.

Asiste o interventor accidental, don José Mosquera Casero, xefe do Servizo de Intervención, en substitución da titular, e dá fe do acto, o secretario xeral, don Francisco Cacharro Gusende.

Non asiste o deputado provincial e vicepresidente 2º don Jorge Pumar Tesouro, que escusa a súa ausencia.

Unha vez aberta a sesión pola Presidencia á mencionada hora, e despois do correspondente estudo e deliberación, adoptáronse os seguintes acordos:

1.- ACTA DA SESIÓN ANTERIOR, ORDINARIA, DO DÍA 30 DE DECEMBRO DE 2016.- Unha vez examinada a acta da sesión ordinaria que tivo lugar o día trinta de decembro de dous mil dezaseis, a Xunta de Goberno da Deputación acordou, por unanimidade, a súa aprobación, sen observacións.

2.- APROBACIÓN BASES REGULADORAS DA CONVOCATORIA DO PREMIO "OTERO PEDRAYO 2016".- Unha vez vistas as bases da convocatoria do premio referenciado no encabezamento, e de conformidade coa proposta formulada, a Xunta de Goberno, por unanimidade, adopta o seguinte acordo:

Aprobar as referidas bases, conxuntamente coas seguintes cláusulas:

1.- Convocatoria

1.1.- Convócase o premio "Otero Pedrayo 2016", dotado con 16.000,00 €, atendendo ás disposicións do regulamento correspondente.

1.2.- Esta convocatoria corresponde ao ano 2016, de acordo co disposto no regulamento, no que se establece o seu ámbito autonómico e o seu carácter anual, convocándose cada ano por



Senatura do Presidente

Serie A N.º 2791692

Acta da Xunta de Goberno correspondente á ordinaria do 13 de xaneiro de 2017

unha das deputacións provinciais da Coruña, Lugo, Ourense e Pontevedra, por esta mesma orde.

1.3.- Atendendo ás razóns expostas, a convocatoria e concesión do premio, na edición de 2016, atribúeselle á Deputación Provincial de Ourense, que consignará, no seu orzamento de gastos o importe do premio (16.000,00 €), máis gastos correspondentes á súa organización, e no de ingresos, as sumas que deberán achegar cada unha das demais deputacións de Galicia, cotitulares do premio, na contía de 2.000,00 €/cada unha delas, e na de 8.000,00 € á Xunta de Galicia.

2.- Obxecto do premio

O Premio "Otero Pedrayo" ten por obxecto:

- 2.1.- Perpetuar e honrar a memoria da persoa egrexia das letras e do coñecemento.
- 2.2.- Premiar un labor que constitúa unha contribución eminente á cultura galega.
- 2.3.- Promover os valores propios de Galicia e as obras que leven ao esclarecemento e á mellora da súa cidadanía e institucións.

3.- Candidatos

3.1.- Poderán optar ao premio:

- as persoas naturais nadas ou residentes en Galicia ou con cumprida raizame nela.
- Os grupos de traballo radicados en Galicia ou constituídos para promover a cultura galega.
- As personalidades ou institucións que se teñan caracterizado pola difusión e polo mantemento da cultura galega.

3.2.- A opción ao premio determinarase por unha candidatura, que poderá ser feita:

- por calquera persoa física ou xurídica das sinaladas no apartado 3.1, respecto de si mesmas.
- polas entidades académicas e culturais galegas respecto dos seus membros.
- por calquera dos presidentes das deputacións provinciais de Galicia, a proposta das respectivas comisións de cultura.



Serie A N.º 2791692

Acta da Xunta de Goberno correspondente á ordinaria do 13 de xaneiro de 2017

- pola Xunta de Galicia, oída a consellería correspondente.
- polo mesmo xurado, xa constituído.

4.- Tramitación

4.1.- A presentación de candidatos ao premio será formulada en escrito dirixido ao Presidente da Deputación Provincial de Ourense, achegando os seguintes documentos:

- recensión biográfica da persoa ou agrupación que aspira ao premio.
- documentos e antecedentes que se consideren de interese para o coñecemento da súa dimensión literaria ou científica.
- cinco exemplares do texto do traballo co que se opta ao premio, presentados a dobre espazo, letra Times New Roman corpo 12, no caso de que a proposta se basee nunha obra ou produción singular concreta.
- no caso de agrupacións e institucións, un exemplar do regulamento ou estatutos polos que se rexan e unha relación de tarefas levadas a cabo en relación co obxecto do premio.

4.2. A presentación de candidaturas realizarase no prazo de tres (3) meses, a partir do día seguinte ao da publicación desta convocatoria no BOP de Ourense.

Tal publicación realizarase tamén nos boletíns oficiais das provincias da Coruña, Lugo, Pontevedra, no "DOG" e nos diarios de máis difusión da Comunidade Autónoma.

4.3.- A presentación do/da candidato/a determina a aceptación íntegra das condicións desta convocatoria e das contidas no regulamento do premio.

4.4.- Unha vez rematado o prazo ao que se refire a liña 4.2. a Secretaría da Deputación de Ourense expedirá certificación das propostas presentadas que, xunto con elas e coa documentación correspondente, pasarán ao xurado do premio, para que todos os membros as coñezan con antelación suficiente á reunión de deliberación.

4.5.- A cada solicitude ou proposta xuntaráselle cantos documentos sexan considerados de interese para o mellor coñecemento do/da candidato/a.

Serie A N.º 2791692

Acta da Xunta de Goberno correspondente á ordinaria do 13 de xaneiro de 2017**5.- Xurado e actuación**

5.1.- Para adxudicar o premio ao que se refire esta convocatoria, constituirase un xurado integrado do xeito seguinte:

- Presidente: o da Xunta de Galicia.
- Vicepresidente: o Presidente da Deputación convocante do premio que, neste ano, lle corresponde á Deputación de Ourense, ou persoa en quen delegue.
- Vogais:
 - os presidentes das tres deputacións restantes ou persoas nas que deleguen.
 - Presidente da comisión de cultura, deportes e mocidade da deputación convocante.
 - O Conselleiro de Cultura da Xunta de Galicia, ou persoa en quen delegue.
 - Un representante de cada un dos seguintes organismos:
 - a) Universidade de Santiago de Compostela
 - b) Universidade de Vigo
 - c) Universidade da Coruña
 - d) Real Academia Galega
 - e) Instituto "Padre Sarmiento" de estudos galegos.
- cinco (5) persoas de recoñecida autoridade científica e literaria, designadas pola Xunta de Galicia e de cada unha das deputacións.

Procurarase a paridade de xéneros nos membros do xurado.

- Secretario, con voz e sen voto, o da Deputación de Ourense.

5.2.- O xurado constituído emitirá o seu ditame no mes seguinte ao día que remate o prazo de presentación de candidatos e a súa actuación suxeitarase ao determinado nos artigos 4.2 a 4.6 do regulamento do premio.





Sinopse de Presidencia
[Signature]

Acta da Xunta de Goberno correspondente á ordinaria do 13 de xaneiro de 2017

5.3.- Da actuación do xurado e da adxudicación do premio será redactada a acta detallada que, unha vez asinada polos seus membros e coa totalidade das documentacións presentadas, pasará a coñecemento do Pleno da Deputación convocante, na primeira sesión que teña lugar.

5.4.- A copia da acta e dos demais antecedentes que cumpran, para o coñecemento da tramitación do premio remitiráselles ás Deputacións da Coruña, Lugo e Pontevedra.

6. Entrega do premio

A entrega do premio realizarase no lugar e na data que determine o Presidente da Deputación de Ourense, nun acto solemne e coa asistencia dos membros da Corporación Provincial e do xurado, así como de personalidades das artes, letras e ciencias da Comunidade Autónoma.

Xunto co premio, a persoa galardoada recibirá unha copia da acta da reunión do xurado.

7.- Normas supletorias

No que non estea previsto expresamente nestas bases, o xurado e a Deputación convocante terán en conta as normas contidas no regulamento do premio e nos xerais do funcionamento da Corporación Provincial.

3.- APROBACIÓN DAS BASES REGULADORAS DA CONVOCATORIA DO PREMIO DE PERIODISMO "XOSÉ AURELIO CARRACEDO", ANO 2017.- Unha vez vistas as bases que rexen a convocatoria do premio de periodismo "Xosé Aurelio Carracedo, e de conformidade coa proposta formulada, a Xunta de Goberno, por unanimidade, adopta o seguinte acordo:

1º.- Aprobar as referidas bases e convocar o premio de periodismo "Xosé Aurelio Carracedo 2017", consonte coas seguintes cláusulas:

Primeira: Poderán optar a este premio todos os profesionais ou colaboradores habituais que exerzan o seu labor en medios de comunicación escritos ou audiovisuais, en calquera das súas modalidades.

Segunda: Consistirá nun único premio e a dotación será de tres mil euros (3.000,00 €).

Terceira: As propostas para optar ao premio poderán ser, indistintamente, presentadas polos propios interesados, pola dirección do medio no que foron publicadas, por institucións, asociacións, colectivos, persoas individuais ou polo propio xurado.

Serie A N.º 2791692

Acta da Xunta de Goberno correspondente á ordinaria do 13 de xaneiro de 2017

Cuarta: Os traballos ou conxuntos de traballos -gráficos, escritos ou audiovisuais-, que participen no concurso, terán que estar publicados en medios de comunicación galegos ou deberán referirse a Galicia, entre o día 1 de xaneiro de 2016 e o día 31 de decembro do mesmo ano.

Quinta: O xurado do premio de periodismo "Xosé Aurelio Carracedo" estará presidido polo presidente da Deputación de Ourense ou persoa en quen delegue, e como vogais, formarán parte do xurado:

- Un representante do Colexio Profesional de Xornalistas de Galicia.
- Un representante da Federación de Asociacións de Periodistas (FAPE).
- Un representante da Facultade de Ciencias da Comunicación de Santiago de Compostela.
- Un representante da Facultade de Ciencias Sociais e Comunicación da Universidade de Vigo.

O secretario do xurado, con voz pero sen voto, será o responsable da Comunicación da Deputación de Ourense.

Sexta: O prazo de recepción de propostas e presentación de traballos pecharase o día 16 de marzo de 2017. Os actos de entrega coincidirán co día 3 de maio (Día internacional da liberdade de prensa).

Sétima: As propostas deberán ir acompañadas de seis fotocopias da páxina ou páxinas en que foron difundidas, se son publicacións impresas. No caso de traballos dixitais, seis copias de capturas de pantalla ou seis copias do texto, nos dous casos con certificado do responsable do medio facendo constar a data de publicación. Se se trata de traballos audiovisuais, presentaranse seis copias en CD, DVD ou lapis dixital, segundo os casos. Se os traballos se publicaron sen se asinar ou con pseudónimo, deberá achegarse un certificado do director do medio, no que conste a data de emisión e nome ou nomes dos autores.

Os traballos remitiráselle á Deputación de Ourense, rúa Progreso, 32, baixo o epígrafe de *Premio de periodismo "Xosé Aurelio Carracedo 2017"*.

Oitava: A participación neste premio periodístico implica a aceptación das bases. Quedan excluídos de participar neste certame os funcionarios e o persoal laboral da Deputación Provincial de Ourense. Valorarase de xeito positivo a realización e presentación de traballos en lingua galega.

Serie A N.º 2791692

Acta da Xunta de Goberno correspondente á ordinaria do 13 de xaneiro de 2017

2º.- A convocatoria deste premio publicarase no BOP e remitírase anuncio ao DOG.

4.- ASUNTOS DE URXENCIA: Non se suscitaron.

5.- COMUNICACIÓN DA PRESIDENCIA.- Non se presentaron.

6.- ROGOS E PREGUNTAS.- Non se formularon.

E, ás nove horas e vinte minutos, do referenciado día trece de xaneiro do ano dous mil dezasete, a Presidencia dá por rematada a sesión da Xunta de Goberno, e redáctase esta acta, que se asinará segundo o legalmente establecido.

O PRESIDENTE,**O SECRETARIO,**